

Adamuridagunt to Tagumairagüdaru Garada to Ayanuhabaun luagu le yubat haun gürigia ubauwagu

Tagúmeseha

Subúsewati ubauwagu, dan lan ligirún gürigia lun ladügüni le ligundan, ibihalai le yubai lun lidan deregüdaguaü, ligia lan lagüchabai gudúmei hadan sun idúheñu.

Subúsewatiluagu, dan lan meferen lan luma mabahüdüniwa lan le yubai lun gürigia, ru lan ubafu lun afásihani, mañuragunti giñe saminaü ubauwagu. Ligia lichigunbai subudi lun giarabailan liñúragun gürigia lidangien anúfudei labu yumúraü le gadanbalin, lun lubá gia láwagachun lau le aubai magundan lan, ariñegalai me le uáguti lafiñera;

Subúsewatiluagu megeiwa tan aban lúruđu lun taunigiruni sun le yubai haun gürigia, lun lubá gia úalá afosuruti lun ladügüni le mabusienru lubai tanágangien lúruđu;

Subúsewati giñe luagu megeiwa lan lahimeidun umádaguaü lidan sun ubau;

Subúsewati luagu, sun lan fulasu le áundarubai tidaun Ubau Uarati rúhamali hafiñe tuagu Garada to, mamai tichiga inébehabu hawagu idúheñu fulásurugu, ayánuha luagu le yubai lun gürigia, ru tugia me úarani lun wügüritabu würi ubauwagu; afiñewati luagu lawánsera lan me sun ubau lugundu hawiwanda me gürigia lidan ibágari richati;

Subúsewati luagu, sun lan ubau le áundarubai tidaun Adámuri Lani Ubau Uarati ariñegaña luagu ñeibai lan inébehabu luagu le yubai lun gürigia adügalai me ligúndan:

Subúsewati luagu, dan úara lan saminaü sigénewali, lagúnfuliruba daradu:

adamuridagunt to

Tagumairagüdaru

garada to ayanuhabaun luagu le

yubathaun gürigia ubauwagu

Lun lubá gia hasubudiragüdüni tila lun sun ubau, haun sun gürigia. Aban gárada íchigutu adundehaní haun sun mutu lun lubá gia inebe lan sun saminaü le tidanbai, haucha wagia me lun taraudún tidan luban furendeí, haun furumieguarügü dandu lidan hágaira ha asibihabalún kaisi lidan sun fulasu le aubai teréreha.

Saminaü 1

Sun gürigia nasíruati yuti lun, lidan úarani, lawiwanduní libágari kai le aubai labúsienra, gatu giñe lanagun lungua buidu hadan líbegu.

Saminaü 2

Ka gürigia, würi, wügüri, yuti lun libíhini sun buidu le tidanbai Gárada to, katai yebe, linásinñu, lewegerún, lagücha, lafiñe, liñeñe, lisáminan luagu gumadi, lúyeri libágari, lagüria haun odi le auti lanagua lungua.

Siñabai giñe, ñei lan díseguau luagu ligáburi saminaü anügüti ubafu bagaira ni luagu tigáburi lúruđu to agumairutu ñei, siñá memebai giñe ñei lan díseguau luagu lúyeri aruwaihaní arainiruti bagaira, dipeni yebe ligia luaigien amu.

Saminaü 3

Ka gürigia yuti lun labágaridun kai le aubai labúsienra, lun lasáriñahan, adügalai me le ligundan inébewa ligia me.

Saminaü 4

Uati lunti lamuridún ni lun lamúdihan, lubá amúdihani luma lalugurún gürigia kai idámuni, faini lumuti lúruđu.

Saminaü 5

Siñati basufuriragüdün gürigia, barügüda, busíganu, anáneiha lun ñeigien bachúraguai.

Saminaü 6

Ka gürigia yuti lun, le ñei lumuti, lun inébewa lan lau lumágagun, lugundgu ka mutu amu lináhuri luai amu.

Saminaü 7

Sun mutu aban habu tigíbugien lúruđu, ani yuti giñe tun lúruđu taríhin hau. Yuti giñe tun lúruđu, lidan úarani, tererehan hau gürigia ligibugien furumieguarügü lúyeri nabahüdüni.

Saminaü 8

Yuti tun lúruđu taríhin lau gürigia dan lérereguní likésin, gounigitai me hawai láganigu.

Saminaü 9

Tanágangien lúruđu, siñati lasiadirún gürigia, siñati lebélorun furísun, siñá labugún lagairagien.

Saminaü 10

Ka gürigia yuti lun, lidan úarani, lagambúniwa ligíbugien gumadi lun lubá gia lasubudiragun lungua, kalan yubai lun, luma le lunbail ladüuguüni tagánagua lúruđu.

Saminaü 11

Yuti tun lúruđu tichigun ubafu lun fulédeiwati lun layánuhan luaugua lidan agúseruni.

Siñabai ladaünragüdünibu gumadi anhain úa lubai bidúrun tidan lúruđu. Siñabai giñe badaürün luagu saragu dan luai le tidanbai lúruđu.

Saminaü 12

Uati lunti láchachan liuma lidaun libágari amu ni lanáneihan haun lidúheñu, madáranhan ligia me hágáradan amu, ua meáuseraguti. Yuti giñe tun lúruđu teréerehan laugien furumieguarügü anhain asúsereda aban lídangien lamíselu le.

Saminaü 13

Ka gürigia yuti lun lasáriñahan le ñeihin lumuti labúsienra, wiwan ligia me lidan furumieguarügü fulasu le auti lagúndara.

Ka gürigia yuti lun láfuridun lidangien furumieguarügü fulasu, íbini lagairagien, giríbuya ligia me lagairaun.

Saminaü 14

Dan lasigirún odi láibahaun furumieguarügü gürigia, yuti lun laríahan múñansu lidan furumieguarügü ubau ani gatu giñe lamuñadún.

Siñabai giñe ladaünrún amuñadahauti luagu furumieguarügü duru anhain úa lubai lúyeri duru ligia tidan gárada to agumairubaun túmagien Ubau Uaratu.

Saminaü 15

Ka gürigia yuti lun gagaira lan.

Siñati beréderuni gürigia luai gagaria lan, siñá beréderuni anhain busien lubai lasansiruni lagaira.

Saminaü 16

Sun wügüriña hama würiña dan busienguaña lan haungua, yuti haun hadügüni habágari le auti helédaguai, katai yebe hanásiñun, hagaira labu hafiñe; wiwan hamai mesun le líchigunbai sibili, lagánagua hamáguatu hamán, labu larigien hígiragun.

Anhain hínsiñegua habai gadara-duntiñu haungua, gawarabai hasibilirún anhaña busien.

Umari habu isanigu hagia lagüchabaña ibágari lidan furumieguarügü adámuri, ani yuti giñe lun adámuri labu uruwai láunigiruniña.

Saminaü 17

Yuti lun ka gürigia larihini lau le lánibai luma le hánibai sungua luagu.

Siñatiberéderuni gürigia luai le lánibai kaisi luai le yubai lun.

Saminaü 18

Sun gürigia yuti haun hasáminarun le autí habúsienra, lun hadügüni le líchigun haritagun haun, subudigüda hamai me hafiñe lun ubau; gawarati giñe hasansiruni kaisi hagumairagüduni, áanhaña busien.

Saminaü 19

Yuti lun ka gürigia laríñeguni lubálití lidan adamuridaguni bidaudu lamanichagüdüniwa, gawara ligia ladügün akútihani, libihin, ariñahaní, subudigüdalai tidangien furumieguarügü gasibu, umálali tuma garüdia.

Saminaü 20

Sun gürigia yuti haun hadamuridagun hama ha úmati habúsienra kaisi haundaruh tidaun furumieguarügü adámuri sűneitu.

Siñati bafósurun gürigia lun lebélurun tidaun aban adámuri.

Saminaü 21

Yuti lun ka gürigia habúduhan lílana lagaira luagu haucha ligia me luaugua lun lebélurun lidaun gumadi.

Sun gürigia yuti haun, lidan úarani, habíhin wadágimanu luma le arruwaihabai hagaira.

Le ligundan ubau ligia lagüchabai ubafu lani gumadi; igundani le, arihúati dan ñei lan asuesihani le ligíaguti, kaisi dan ñei lan abúduhani lidan larúman.

Saminaü 22

Ka gürigia kai lílana fulasu, yuti lun libihin sun lúyeri idemuai-seinsu, ibágari, aníchigudandu hámagien lílana lagaira kaisi lasúrunigien, lun lubá gia lasandiragun lungua kai aban gürigia seríwiti.

Saminaü 23

Ka gürigia yuti lun lidan úarani, libihin aban wadágimanu, lun laríahan wadagimanu lehínsiñeti lun, kai gubairügü libihin idemuai dan mayábun lan.

Yuti lun ka gürigia, lidan úarani, libihin aban meme fayeí luagu aban meme lúyeri wadágimanu.

Yuti lun ka gürigia awadigimariduti, libihin fayeí lun gawarabai lan lawíwandun habu lánigu, ibiha ligia me, anhain emégeira, amu idemuai lumagien uruwai.

Yuti sun gürigia hadügün aban adámuri lenébase wadágimanu, belú hagia me tidaun, lun lubá gia haunigiruní le yubai haun.

Saminaü 24

Sun gürigia yuti haun, heméragun larigien somu dan wadágimanu, lun hasáriñahan dan mawadigimaridun hamán, kaisi tafayeirún hasáriñahan haun.

Saminaü 25

Ka gürigia yuti lun lamnúgün aban lúyeri ibágari richati, lun lubá gia gawara lan ladairun atuadini, araini, aigini, daüguaü, muna, lafaáyeirun surúsia luma furumieguarügü megeiguaü haun lánigu. Yuti giñe lun, libihin idemuai dan mayábun lan, dan lasándirun, dan lasiñaragún lungua, dan hilaru, lúmari, dan lawaiyadun, kai gubairügü furumieguarügü idemuai dan mama lan ligia íchiga üma lun leferidiruní lébuna libágari.

Yuti haun dagainatiñu habu iráhüñü lun letenirún haun, lau duári. Sun iráhüñü ha nasíruatiñu lidan odi bárugudi luai sinbili, yuti haun hauniguirún lidan aban.

Saminaü 26

Sun güurigia yuti haun habihin furendei. Anhaña atúriaha tidan luban furumieti furendei, mafayeirúbaña ni aban gáwanü. Yuti lun uruwai laturiagüdüniña gürigia tidabn luban furumieti furuendei. Aturiahani tidan luban segandi furendei aban memebai lila haun sun mutu. Liabin ti ebéluruni tidaun luban furundei iñuti, hafu lauchun gürigia luaugua.

Sun furendei mosu taríahan tahímeidun lusan gürigia, ru ligia inébehabu luagu sun le yubai haun lílana fulasu; luyéri furendei le lunbai libihini gürigia gatu giñe líchigun saminaü lun ñeibai lan gufúrandau, awandahani labu umádaguaü hadan sun mutu, itararügübai gawara lan lawándahani labu umádaguaü hadan sun mutu, itararügübai gawara lan lawánserun tuádigimari Ubau Uaratu, lun lubá gia ñei meme lan darangilaü ubauwagu.

Yuti haun agüburigu hasuesihani luyéri furendei le lunbai habihini hasanigu.

Saminaü 27

Yuti lun ka gürigia láundarun lidaun lechun lagaira, le auti labúsienra, lun layúsurun lídangien hadíñeburi, ideha ligia me lun lawanserun lagaira.

Ka gürigia yuti lun taunigirún lidíñeburikai hamuga: garüdia, akútihani, féindiraeréreha tugia me lúrudu laugien.

Saminaü 28

Ka gürigia yuti lun lauchun, lun ñeibai lan aban ürudúni lun giarabai lan lagúmairun sun saminaü le tidanbai Gárada to.

Saminaü 29

Sun gürigia anihain lunti ladügüni luagu lagaira, mamai ñei lagüriahauwa, ñei tahímeida lusan.

Sun gürigia mosu inébebaun tan lúrudu lun, ladüga tugiarügüñaun lan ariha lau le yubai haun amu, tugia aunigirubalin ibagari fulásrugu, ru tugia buídumei lun bawíwandun tidan aban adámuri úaratu.

Mauwebudunbai sun saminaü le tidanbaun Gárada to, anhawa magúnfulirun lau tubálití Ubau Uaratu.

Saminaü 30

Uati ni aban saminaü tidan gárada to lun hamuga líchigun ubafu lun furumieguarügü (kai hamúga gürigia, adámuri, uruwai) lun gawarabai lan ladügün somu katai barúnati luagun tubálití gáarada to.